

Visoki predstavnik smijenio ministra obrazovanja Republike Srpske Milovana Pecelja

Visoki predstavnik Paddy Ashdown danas je donio Odluku o smjeni ministra obrazovanja i kulture Republike Srpske Milovana Pecelja sa te dužnosti. Ministar Pecelj je smijenjen jer je cijelu godinu ignorisao svoju ministarsku odgovornost da provede Odluku visokog predstavnika od 30. juna 2004. godine kojom se smjenjuje Radomir Lukić sa pozicije dekana Pravnog fakulteta Univerziteta u Istočnom Sarajevu.

Odlukom visokog predstavnika smjenjuje se gđin Pecelj sa ministarske funkcije i zabranjuje mu se obavljanje svake službene, izborne ili imenovane javne funkcije, te kandidovanje na izborima, ukoliko ili sve dotle dok ga visoki predstavnik naknadnom odlukom izričito ne ovlasti.

Konkretno, gđin Pecelj nije ispunio svoje zakonske obaveze u pogledu nastavka nezakonitog radnog odnosa gđina Lukića na Pravnom fakultetu Univerziteta u Istočnom Sarajevu. Ovo je pitanje koje spada pod njegov direktni ministarski nadzor.

Gđin Pecelj nije izdao javno saopštenje, kako bi informisao studente da je gđinu Lukiću zabranjeno da obavlja sadašnju funkciju i da će, ako posljedica toga, sve ocjene, diplome i ostali dokumenti koje je on potpisao biti automatski nevažeći.

Autonomni status univerziteta u BiH ne znači da njihovo osoblje može kršiti zakon.

“Samo pridržavajući se zakona i djelujući u interesu svih građana i institucija budućnost ove zemlje može biti osigurana,” istakao je danas visoki predstavnik. “Ne mogu prihvatiti svjesnu, ponovljenu i dugotrajnu opstrukciju procesa od osobe koja obnaša ministarsku funkciju.”